

Script of Morning Gojri News Bulletin 31 October 2024 at 1015Hrs

ما رنینگ گو جری نیوز بلیٹن مورخہ 31 اکتوبر 2024

یوہ آکا شوانی جموں ہے محمد اکرم چودھری تیں خبر سُنو۔

Prez Sardar Patel

صدر جمہوریہ درویدی مُرمو نے اج سویرے نوی دہلی غا پا ٹل چوک مانہ سردار ولہہ بھائی پٹیل غا مجسمہ ور پھل چاڑ غے اُن نانہہ خراج عقیدت پیش کیو۔ اس موقعہ ور نائب صدر جمہوریہ جگدیپ دھنکڑ نے وی مجسمہ ور پُھل چاڑ غے خراج عقیدت پیش کی۔ واضع رہ جے اج قوم سردار پٹیل غا یوم ولادت ور ایکتا دیوس منا رہی ہے۔ ہر سال 31 اکتوبر نانہہ قوم سردار ولہہ بھائی پٹیل غی یوم پیدائش غی یا د مناوے۔ جہیڑا بھارت غی جدوجہد آزادی مانہہ اک اہم شخصیت اور ملک غا پہلا نائب وزیر اعظم تے وزیر داخلہ رہیا ہیں۔ وزیر اعظم وی اج اُترن مین سردار پٹیل گا جنم تہاڑہ ور راشٹریہ ایکتا دیوس تقریب مانہہ حصول گاہ۔ وزیر اعظم سردار ولہہ بھائی پٹیل غا ایکتا نگر مانہہ اتحاد بارے مجسمہ ور پُھل چاڑ غے خراج عقیدت پیش کریں گا۔ اور ایکتا دیوس غا عہد غی وی صدارت کریں گا۔ وزیر اعظم ایکتا دیوس پریڈ مانہہ موجود رہیں گا۔ اس سال پریڈ مانہہ 9 ریاستاں تے 1 مرکز غے زیر انتظام علاقہ توں 16 مارچینگ دستو حصول گاہ جن مانہہ 4 مرکزی مسلح پولیس دستہ، این سی سی تے اک مارچینگ بینڈ وی شامل ہے۔

Diwali

اج پورا مُلک غے اندر دیوالی غو تہوار بڑا جوش و خروش نال منایو جا رہیو ہے۔ اُتر پر دیش غا آیو دھیا مانہہ سریو دریا غے کنارہ ور بڑو دیپ اُتسو منایو جا رہیو ہے۔ اس سلسلہ مانہہ اُتر پر دیش غا وزیر اعلیٰ یوگی آدیتا ناتھ نے کہیو ہے جے یوہ سال آیو دھیا واسطے بڑو خاص ہے۔ کیونجے اس سال غا 22 جنوری نانہہ 5 سو سال گا لہما انتظار توں بعد بھگوان رام نانہہ نواں تعمیر شدہ مندر مانہہ واپس آئیو گیو ہے۔ وزیر اعظم نریندر مودی نے مُلک غا لوکاں نانہہ دیوالی غا اس تہاڑہ ور مبارکباد پیش کی۔ اک سماجی پوسٹ مانہہ جناب مودی نے لوکاں نانہہ خوشحال تے صحت مند رہن واسطے نیک خواہشات دتی۔ اُنہاں نے دُعا کی جے بھگوان شری گنیش تے ماں لکشمی لوکاں ور اپنو کرم بنائے رکھے۔ اس موقعہ ور لیفٹننٹ گورنر منوج سنہا نے وی لوکاں نانہہ دیوالی غی مبارکباد پیش کی۔ اُنہاں نے اپنا اک پیغام مانہہ کہیو جے اُون دیوالی غا اس دن ور لوکاں نانہہ نیک خواہشات پیجوں۔

DA Hike

پرسنل عوامی مسائل اور پنشن غی وزارت غے تحت پنشن اور پنشنراں غی بہبود نے مرکزی سرکار غا ملازمین نانہہ مہنگائی آلا وُنس غی اضافی قسط اور پنشنراں نانہہ یکم جولائی تیں مہنگائی رلیف غی اطلاع دتی ہے۔ اس دوران مرکزی کا بینہ نے مرکزی ملازمین تے پنشنراں واسطے ڈیرنس رلیف تے ڈیرنس آلا وُنس مانہہ 3 فیصد اضافی قسط نانہہ منظوری دتی ہے۔

Diwali Prepration

دیوالی غا تہوار توں پہلاں خوراک تحفظ افسران غی اک ٹیم نے ضلع رام بن مانہہ مٹھائیاں غی دکاناں غو معائینو کیو۔ معائینہ ٹیم نے 19 دکاناں غو معائینو کیو تے اُتوں مٹھائیاں، کھویا، لڈو، سون پاپڈی وغیرہ گی جانچ واسطے نمونہ اکھٹا کیا۔ اس دوران اُن نے 2 دکاناں نانہہ غیر حفظان صحت واسطے چلان وی کیا۔ محکمہ غا حوالہ سنگ دسیو گیو ہے جے دیوالی غا تہوار تک یاہ مہم جا ری رہ گی۔ اُنہاں نے کہیو جے اگر کوئی خوراک مہیا کران آلو کاروباری ادارو کسے وی طرح غی غیر قانون سرگرمی مانہہ ملوٹ پایو گیو تاں اُن نانہہ خوراک تحفظ واسطے قانون غے تحت سختی نال نمڑیو جائے گو۔ اس دوران صارفین نانہہ کہیو گیو ہے جے وے محکمہ غا ہیلپ لائن نمبر 104 ور اُن لائن شکایت درج کرا سکیں گا۔ اگر اُن نانہہ کھان پین غی چیزاں مانہہ کسے طرح غی ملاوٹ با رے پتو چلے گو۔ دکانداراں نانہہ صلاح دتی گئی ہے جے وے صاف ستھرائی غو خاص دھیان رکھیں۔

Special Train

تہواری موسم غے پیش نظر مسافراں نانہہ سہولت فراہم کرن گا مقصد نال بھارتیہ ریلوے نے جموں توی تیں 2 خصوصی ریل گڈیں چلان غو اعلان کیو ہے۔ آکاشوانی جموں غا نمائندہ نے خبر دتی ہے کہ جموں توی ہا وڑہ تہواری خصوصی ریل گڈی جموں توی تیں شام 8 بجے 20 منٹ ور نکلے گی جہیڑی 2 تہاڑاں بعد 1 بجے 20 منٹ ور ہا وڑہ پُجے گی۔ اسے طرح ہا وڑہ تیں پہلی تے 6 نومبر نانہہ خصوصی ریل گڈی رات 11 بجے 45 منٹ ور نکلے گی جہیڑی 2 بعد دوپہر 3 بجے 20 منٹ ور جموں ریلوے سٹیشن ور پُجے گی۔ اسے طرح دوجی ریل گڈی کٹڑا تیں کمکھیا غے بشکار چلے گی جہیڑی اج تے 5 نومبر نانہہ کمکھیا تیں سویرے 6 بجے چلے 2 دن بعد سویرے 6 بجے 20 منٹ ور کٹڑا پُجے گی۔ جد کہ 2 نومبر نانہہ کٹڑا تیں یاہ ریل گڈی 6 بجے 40 منٹ ور روانہ وے گی۔
